

LE CHAPITRE D HEGIR,
 contenant soixante & dix sept versets,
 escrit à la Meque.

AV nom de Dieu clement & misericordieux.
 Je suis Dieu misericordieux. Ces signes
 sont les signes de l'Alcoran qui distingue le bien
 d'avec le mal. Comme peuvent esperer les infi-
 delles ce que les vray-croyans doiuent esperer?
 abandonne les, qu'ils mangent (le bien des pauvres)
 qu'ils s'enrichissent, & qu'ils se contentent dans
 leurs esperances, ils verront vn iour qu'elle sera
 leur fin. Nous n'auons point exterminé de ville
 que le temps destiné à sa ruyne n'ait esté expiré, il
 n'y a point de nation qui puisse auancer ny retar-
 der sa destinée. Les impies ont dit, ô homme qui
 crois que l'Alcoran t'a esté enuoyé, nous dirons que
 tu es vn forcier, iusques à ce que les Anges nous
 affurent que tu es veritable: Les Anges ne descen-
 dront pas en terre si ce n'est pour les chastier, & ne
 pourront pas retarder le temps de leur punition;
 Certainement nous auons enuoyé l'Alcoran en ter-
 re, & le conseruerons sans alteration; nous auons
 cy-deuant enuoyé des Prophetes les vns apres les
 autres, les impies se sont mocqués d'eux, & les ont
 mespré, ainsi s'imprime l'impieté dans le cœur

*Hegir est
 une ualee.
 auprès de
 la Meque
 Voy Kirab
 el tenoir.*

*Voy k. ab
el tenoir.*

des meschans, ils ne croiront pas au Prophete, & encourront la punition de ceux qui les ont precedez; si nous leur ouurons l'entrée du Ciel, & s'ils voyoient entrer & sortir (les Anges) à l'ombtage de la porte, ils diroient encore que leurs yeux sont enchantez, & qu'ils sont enforcelez, nous auons créé des signes au Ciel, & les auons ornez d'estoiles pour contenter l'esprit de ceux qui les considerent, nous les auons mis à couuert des efforts du Diable, mais le papillon fuy tout ce qui reluit, & croit que c'est vne estoile, nous auons estendu la terre & elleué les montagnes avec proportion, nous luy auons fait produire toute sorte de fruiets pour vous substantier & pour vous enrichir; nous auons gardé en nostre pouuoir les clefs de les tresors pour les distribuer à mesure qu'il sera necessaire; nous auons fait esleuer vn vent frais, & auons enuoyé la pluye pour l'arrouser, ce n'est pas vous qui faites produire ses fruiets, c'est nous qui donnons la vie & la mort, & disposons de tout ce qui est au monde; Nous scauons quels ont esté ceux qui vous ont precedez, & quels seront ceux qui vous succederont, ie les assembleray tous à la fin du monde pour estre jugez, nous auons créé l'homme du limon de la terre, & auons auparauant luy créé le Diable de feu sans fumée. Souuiens-toy que Dieu a dit à ses Anges, ie créeray l'homme du limon de la terre, ie souffleray contre luy pour luy donner la vie, prosternez vous deuant luy & l'adorez, les Anges l'ont adoré

adoré

adoré excepté le Diable, Dieu luy a dit, pourquoy n'adores-tu pas l'homme? il a respondu, ie ne l'adoreray pas, tu m'as creé de feu & tu l'as creé de la bouë de la terre, il a dit, Sors du Paradis, tu en seras banny & maudit iusques au iour du Iugement. Seigneur, dit le Diable, ne me dōne ta malediction que iusques au iour du Iugement; Il dit, tu seras maudit iusques au iour nommé; Seigneur, dit le Diable, ie tenteray toutes les creatures, parce que tu m'as tenté, ie les feray desobeyr à tes commandemens, excepté ceux qui se confieront en toy, & qui se resigneront à ta diuine volonté; Dieu dit, c'est le droict chemin, tu n'as point de pouuoir sur les gens de bien qui suiuent ma loy, mais seulement sur les infidelles ausquels l'Enfer est preparé. L'Enfer a sept portes, & chaque porte a son faict particulier, les gens de bien habiteront dans des jardins ornez de belles fontaines, nous les deliurerons de toute sorte de rancunes, ils reposeront sur des lits comme freres avec respect & bien-veillance, & seront dedans vne eternelle felicite; Annonce à ceux qui m'adorent que ie suis clement & misericordieux, & que mes chastimens sont rudes & rigoureux. Presche leur l'histoire des hostes d'Abraham, ils l'ont saluë lors qu'ils sont entrez en sa maison, Abraham a eu peur de leur venuë, ils luy ont dit, n'aye pas peur de nous, nous sommes Messagers de Dieu, nous t'annonçons que tu auras vn fi's qui sera grand personnage, m'annoncerez-vous, dit-il, que l'au-

ray vn enfant en ma vieillesse ? Pourquoy parlez-vous de la façon ? Nous te disons la verité, ne desespere pas de la grace de Dieu, personne n'en desespere que les meschans, O Messagers de Dieu, dit Abraham, que demandez-vous ? Nous sommes enuoyez pour exterminer les infidelles, & pour sauuer toute la famille de Loth excepté sa femme, elle demeurera entre ceux qui seront chastiez. Lors que ces Messagers ont esté arriuez chez Loth, il leur a dit qu'il ne les cognoissoit pas, ils luy ont dit, nous sommes venus chez toy pour esclaircir ce peuple du doute qu'il a de la toute-Puissance de Dieu, ce que nous te disons est tres-veritable, faits sortir ta famille cette nuit de la ville, & la suis pas à pas, que personne d'entre vous ne regarde derriere soy, & allez où vous serez commandé; les impies seront tous exterminés le matin. Les habitans de la ville sont venus chez Loth pour voir ces estrangers, Loth leur a dit, ie vous prie de ne vous pas salir avec mes hostes, craignez Dieu, & ne vous deshonnerez pas vous-mesmes, voila mes filles prenez-les; ils ont dit, nous ne t'empeschons pas de loger tes hostes, & sont demeurez confus dans leur yurognerie. Le matin le tonnerre les a surpris, nous auons renuersé la ville le dessus dessous, & auons fait pleuvoir des pierres avec du feu qui l'ont entierement ruinée. Cela seruira d'exemple aux passans qui verront ces ruines, & de marque de la toute-Puissance de Dieu à ceux qui croiront en sa diuine Majesté. Ceux qui

habitoient les bois auprès de la Medine estoient des meschans, mais nous nous sommes vengez d'eux, ils ont seruy d'exemple à la posterité comme le peuple de la ville de Loth. Ceux qui habitoient en la vallée de Hegir ont dementy les Prophetes, nous leur auons fait voir nos miracles, & leur auons enseigné nos commandemens; ils les ont mespris, mais ils repositoient le matin dans leurs maisons basties sur les montagnes, & dans leurs forteresses, lors que le tonnerre les a surpris, leurs tresors ne les ont pas sauuez, & ont esté tous exterminéz. Nous n'auons créé la Terre & les Cieux que pour marque de la verité & de nostre vnité: L'heure du Iugement s'approche, absente-toy de ton peuple avec douceur, ton Seigneur qui a créé toute chose sçait tout. Nous t'auons enseigné sept signes, & l'Alcoran tres-precieux. Ne t'arreste pas à considerer les diuerses sortes de biens que les impies possèdent, ne t'afflige pas s'ils persistent en leur impieté; Dis leur, ie ne presche autre chose que la parole de Dieu & les peines de l'Enfer. Nous chastierons les impies comme nous auons chastiez ceux qui ont diuisé l'Alcoran, qui en ont approuué vne partie, & ont abjuré l'autre; Je suis ton Seigneur, ie leur demanderay compte de leurs actions, presche ce qui t'a esté commande, & t'esloigne des infidelles, nous te preseruerons de ceux qui se moqueront de toy comme aussi de ceux qui adorent les Idoles; Je sçay que

*C'est la
preface de
l'Alcoran
qui con-
tient sept
versets.*

tu t'affligeras de leurs discours, mais louë & adore ton Seigneur iusques à la mort.

LE CHAPITRE DE LA MOUCHE
à Miel, contenant cent vingt-huit versets, escrit à la Meque.

*Voy Gé-
laldin.*

AV Nom de Dieu clement & misericordieux. La punition de Dieu n'est pas esloignée, ne la souhaitez pas auant son temps, loué soit Dieu, il n'a point de compaignon, il fait descendre les Anges, & enuoye ses inspirations à qui bon luy semble, preschez sa puissance, & les peines de l'Enfer aux infidelles, il n'y a point de Dieu que luy, craignez-le, il a créé la Terre & les Cieux, il est plus puissant que vos Idoles, & il a créé l'homme de la bouë de la terre, neantmoins il est opiniastre en son orgueil, il a créé les animaux mondes pour vostre vsage, vous en tirez vn grand profit & vn grand auantage pour vous vestir & vous nourrir, vous voyez leur beauté lors qu'ils s'engraissent & lors qu'on les meine paistre, ils portent la charge & tout ce que vous voulez enuoyer dans les villes, ce que vous ne pourriez pas porter sans eux qu'avec vn tres-grand travail, Dieu est clement & misericordieux enuers vous, il a créé les cheuaux, les mulets, & les asnes